

acceperere (neque ipse manus feritate dedisset),  
 pastorum et solis exegit montibus aeuum.  
 hic natam in dumis interque horrentia lustra 570  
 armentalis equae mammis et lacte ferino  
 nutribat teneris immulgens ubera labris.  
 utque pedum primis infans uestigia plantis  
 institerat, iaculo palmas armauit acuto  
 spiculaque ex umero paruae suspendit et arcum. 575  
 pro crinali auro, pro longae tegmine pallae  
 tigridis exuuias per dorsum a uertice pendent.  
 tela manu iam tum tenera puerilia torsit  
 et fundam tereti circum caput egit habena  
 Strymoniamque gruem aut album deiecit olorem. 580  
 multae illam frustra Tyrrhena per oppida matres  
 optauere nurum; sola contenta Diana  
 aeternum telorum et uirginitatis amorem  
 intemerata colit. uellem haud correpta fuisset  
 militia tali conata lacescere Teucros: 585  
 cara mihi comitumque foret nunc una meorum.  
 uerum age, quandoquidem fatis urgetur acerbis,  
 labere, nympa, polo finisque inuise Latinos,  
 tristis ubi infausto committitur omine pugna.  
 haec cape et ultricem pharetra deprome sagittam: 590  
 hac, quicumque sacrum uiolarit uulnere corpus,  
 Tros Italusque, mihi pariter det sanguine poenas.  
 post ego nube caua miserandae corpus et arma  
 inspoliata feram tumulo patriaeque reponam.  
 dixit, at illa leuis caeli delapsa per auras 595  
 insonuit nigro circumdata turbine corpus.

At manus interea muris Troiana propinquat,  
 Etruscique duces equitumque exercitus omnis  
 compositi numero in turmas. fremit aequore toto